



Gabinete Wever - Croes II

ISLAONLINE


Noticia di Gobierno

2023

Diaranson 30 Augustus 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Evelyn Wever-Croes
PROME MINISTER

En conexion cu instalacion di eBoards

PIUS X SCHOOL TA GRADICI PROME MINISTER Y PARLAMENTARIONAN PA NAN BISHITA



En conexion cu instalacion di eBoards na Pius X School, Prome Minister Evelyn Wever-Croes, hunto cu Presidente di Parlamento Edgard Vrolijk y Parlamentario Hendrik Tevreden a bishita e scol diamars mainta. Pius X School ta un di e scolnan cu tambe a gana e proyecto di Edutech. En total e scol por a cumpra 7 eBoards y pa completa cu tur e 9 klasnan haya eBoards, WEB Aruba NV a sponsor 2 eBoards.

Cabesante di Pius X School, Juffrouw Sheila Tromp, den nomber di e scol a gradici e mandatarionan pa nan bishita pa no solamente wak kico e scol a logra den a area di innovacion y e fondo cu nan a ricibi di e Proyecto di FUTURA, pero tambe pa asina haya un bista di tur loke e scol ta brinda nos muchanan den enseñansa y e avansenan pa haci enseñansa dinamico pa asina trece cada biaha e miho pa nos muchanan. Juffrouw Tromp ta gradici tambe FUTURA pa e bunita proyecto.

Prome Minister Evelyn Wever-Croes ta gradici Presidente di Parlamento Edgard Vrolijk y Parlamentario Hendrik Tevreden kendenan sigur, como parlamentarionan, tin progreso di enseñansa como prioridad. Ambos Parlamentario a gradici Prome Minister y Pius X School pa e oportunidad pa bishita e scol y mira e avansenan den innovacion y modernisacion den enseñansa na Pius X School.



Prome Minister Evelyn Wever-Croes:

PROME MINISTER HUNTO CU COLEGANAN MINISTER A ATENDE CUMBRE DI SAN NICOLAS BUSINESS ASSOCIATION

Gobierno ta sostene tur iniciativa pa desaroya y difersifica economia di Aruba

Diaranson mainta 30 di augustus, Gobierno di Aruba a atende e cumbre organisa pa San Nicolas Business Association (SNBA). Pa di dos aña consecutivo, SNBA ta invita inversionistanan cu ta interesa pa inverti den San Nicolas, pa un cumbre cu ta tuma luga na San Nicolas. Prome Minister Evelyn Wever-Croes acompaña pa coleganan Minister Glenbert Croes, Geoffrey Wever y Endy Croes, y Parlamentario Alvin Molina tawata presente na e cumbre.

Prome Minister a duna di conoce cu pa Gobierno di Aruba, ta importante pa SNBA y e pueblo di San Nicolas y Aruba en general sa cu Gobierno ta sostene tur iniciativa pa desaroya y difersifica economia di Aruba, y especialmente di San Nicolas.

Aruba ta den recuperacion. IMF, na comienso di e pandemia caba a indica cu Aruba lo ta e pais cu lo wordo mas fuertemente afecta door di e pandemia. Y esaki a resulta asina tambe. Aruba a wordo afecta severamente mirando cu Aruba ta depende di turismo. Recien, e mesun IMF a indica atrobe cu Aruba ta un di e paisnan cu a recupera mas impresionantemente di e pandemia. Esaki, Prome Minister a enfatisa ta danki na e trabou duro di cada ciudadano di nos pais, y e amor grandi cu nos tin pa nos pais y pa hiba nos pais padilinti.

“Nos no ta ainda caminda nos mester ta. Economia a pick up bek. Nos tin un crecimiento economico cu a hiba nos na nivelnan ya caba cu a surpasa prome cu e pandemia. Turismo tambe ta na un nivel miho di loke e tawata prome cu e pandemia. Loke si ainda no ta na nivel cu prome cu e pandemia ta desempleo apesar cu esaki ta bahando. Finanzas publico tambe ta keda un reto. Aruba no tin hopi placa y mester bay paga e debe di e pandemia bek. Pero nos ta riba e bon caminda. Y pa e motibo aki tambe ta importante pa iniciativanan asina pa stimula inversion y atrae inversionistanan pa Aruba”, Prome Minister a remarca.

Prome Minister ta gradici San Nicolas Business Association pa nan iniciativa pa atrae inversionistanan pa Aruba y especialmente pa San Nicolas. Gobierno di Aruba ta sostene e iniciativa aki. Prome Minister ta gradici tambe tur inversionista cu a presenta nan proyecto durante e cumbre.





TIPO DI DESPERDICIO ACEPTA DURANTE BAKI DEN BARIO

Campaña Limpi Limpi



Diasabra awor, 2 di september, e prome baki den bario pa desperdicio lo tuma luga como parti di campaña nacional 'Limpi Limpi'. Riba e fechanan di e evento aki lo pone baki na diferente districto di Aruba for di 8'or di mainta te cu 12'or di merdia. Na cada sitio lo tin baki pa diferente tipo di desperdicio pa asina esaki por wordo separa. E separacion di desperdicio ta facilita y maximalisa desperdicio su procesamiento como tambe su reciclahe, asina yudando conserva nos medio ambiente.

Campaña nacional 'Limpi Limpi' tin como un di su metanan e conscientisacion di nos pueblo tocante maneho di desperdicio responsabel, bou di cual separacion ta forma parti. Baki di desperdicio den bario ta estrictamente pa desperdicio residencial. Desperdicio commercial no lo wordo acepta y Bureau City Inspector ta encarga cu supervision y control durante e actividad pa percura pa cu esaki.

Kico ta e tipo di desperdicio cu por wordo treci na Parke Limpi Limpi?

E-WASTE

e-Waste ta referi na tur aparato electronico rond di cas cu no tin uzo mas of cu no ta sirbi. Algun ehempel di e-Waste ta:

- Television • Computer • Laptop • Printer • Celular • Radio
- Speaker • Camara • Consola di Wega (X-Box, Playstation, Nintendo)

No por trece bateria di un solo uso ni rechargeable (AA, AAA, etc.). Tene esakinan na cas te proximo aviso.

GREEN WASTE

Green Waste ta referi na material cu ta biodegradabel cu ta sali di naturalesa. Esaki ta exclui material manera cuminda, pallet, plywood, etc.

Algun ehempel di Green Waste ta:

- Planta • Palo di mata • Blachi di mata • Yerba

CONSTRUCTION WASTE

Construction Waste ta referi na desperdicio cu ta wordo produci ora di construccion cu ta relativamente limpi y por wordo recicla. Esaki ta estrictamente exclui asbest.

Algun ehempel di Construction Waste cu ta recicla na Aruba ta:

- Cement • Santo • Pavers • Concrete

BULK/MIXED WASTE

Bulk/Mixed Waste ta referi na obhetonan di tur tipo cu no por wordo recicla of mester di wordo pre-procesa pa por saca e material recicla (por ehempel, metal di un corchon). Esaki ta estrictamente exclui material radioactivo, kimico, azeta, verf, etc. Algun ehempel di Bulk/Mixed Waste ta:

- WC • Fregado • Mueble • Corchon • Paña • Tubo di PVC/Tubo
- Tur tipo di plastic • Rubber • Taira • Palo/Plywood • CD/Disco

METAL

Metal como desperdicio ta referi na tur tipo di material cu ta contene cantidad grandi di metal haya rond di cas. Esaki ta exclui auto bieuw (wacharaca).

Algun ehempel di esaki ta:

- Stoof • Dryer • Cabel/Waya • Wasmashin • Airco • Pijp/Tubo
- Mueble di hero • Parti di motor • Bais • Zinc roof sheets (Zim)
- Heki di hero • Herment • Pomp • Aluminum bentana/porta

Pa mas informacion of cualkier pregunta por tuma contacto cu naturalesa@gobierno.aw of bishita www.trashtocasharuba.org/limpilimpi.



Dangui Oduber
MINISTER

RIU HACIENDO INVERSIONNAN GRANDI DEN RENOBACION



Diaranson mainta Minister di Turismo y Salud Publico sr. Dangui Oduber a bay na Riu Antillas y Riu Palace caminda a ricibi un recorrido. E mandatario a wordo ricibi na un manera masha caluroso pa e Manager Regional di Riu Hotels sr. Juan Blanco conhuntamente cu e dos Gerente General di ambos Hotel y demas staff.

Minister Oduber a keda masha impresionado cu su bishita. Riu ta un compania cu tin un impacto grandi riba nos turismo y nos economia. Nan ta conta cu mil empleado di cual hopi ta Arubiano. Durante e recorrido Minister Oduber a topa cu varios Arubiano cu a haya oportunidad na Riu Hotel pa por desaroya nan mes den e compania.

Locual ta importante pa menciona ta cu Riu Hotel ta comprometi pa sigui haci inversion den locual ta e mehoracion di su propiedadnan. Recientemente Riu a caba di haci un inversion di 40 milyon dollar. Esaki ta pa upgrade, drecha y renobacion di tur e cambenan den Riu Antillas. Awor Riu ta bolbe bay haci un otro inversion quantioso di 40 milyon dollar, e biaha aki ta pa Riu Palace.

Segun Minister Oduber di e manera aki Riu Hotel ta demostra no solamente nan compromiso sino nan confiansa den e maneho cu ta wordo hiba. Un maneho cu ta dunando resultado caminda Aruba ta bay registra un di e mihor añanan pa cu



turismo den nos historia.

E mandatrio a keda masha contento di e recorrido cu e la ricibi den ambos hotel. Riu hotel ta un hotel di calidad y di 5 strefa. Locual ta importante ta cu nan a comenta cu nan ta zorg pa nos localnan haya e cuponan di trabou.

Finalmente e Minister Dangui Oduber ta gradici sr. Juan Blanco y su staff pa e bunita recorrido. Gobierno ta desea Riu Hotel tur clase di exito pa futuro, un hotel cu sigur a contribui grandemente na Aruba su economia.



MINISTER ENDY CROES TA FELICITA ELITE PRODUCTIONS & ENTERTAINMENT CU 15 AÑA DI INNOVACION DEN E INDUSTRIA DI ENTRETENIMIENTO



Recientemente, Minister Endy Croes a atende e “Client Appreciation Event” organisa pa Elite Productions & Entertainment pa gradici nan cliente pa nan sosten durante 15 aña. Tambe presente na e ocasion special aki, tabata colega Minister Xiomara Maduro y Parlamentario Alvin Molina. Un anochi yena di innovacion, gratitud y alegria. Un di e “high light” di e anochi tabata e Keynote Speaker Sr. Pierre Hacher, “Top Music Lawyer” di Merca pa Billboard Magazine y experto renombra den e industria di entretenimento.

Sr. Hacher a duna un tremendo presentacion di e topico “The Power of Customer Experience & Authenticity”. Durante e evento a ilustra e utimo den tecnologia y innovacion den audio visual. Como muestra di aprecio y gratitud a sorprende e invitadonan presente cu presentacion di, entre otro, Jeon. Tambe na e ocasion special aki, a brinda pa e 15 aña di Elite den e mundo di entretenimento. Conluyendo, Minister Endy Croes ta gradici Elite Productions & Entertainment pa e invitacion alabes, ta felicita nan cu un excelente y innovativo evento.



MINISTER ENDY CROES TA DESEA SR. VINCENT STORIMANS HOPI EXITO COMO REPRESENTANTE NOBO Y HEFE DI VNO NA ARUBA



Diamars ultimo, a introduci Sr. Vincent Storimans como e representante suplente y hefe di Vertegenwoordiging van Nederland in Aruba (VNO). Minister di Enseñansa y Deporte Endy Croes tabata presente na La Quinta del Carmen durante e recepcion. Tambe presente na e ocasion aki tabata Minister President Evelyn Wever-Croes, Presidente di Parlamento di Aruba mr. Edgard Vrolijk, mandatario, parlamentario, hefe di Departamentonan di Gobierno y demas invitadonan. Durante e anochi ameno aki, Sr. Storimans a inicia su discurso na Papiamento y despues a continua na Hulandes, unda cu el a enfatisa cu e ta cla pa contribui den e desaroyo entre Aruba y Hulanda.

Sr. Storimans a studia derecho priva Europeo na Universidad di Amsterdam y a traha como diplomaat na Embahada Hulandes na Moscu, Beijing y Washington D.C., su ultimo funcion como consul general suplente na San Francisco. Na aña 2013 te 2015 a traha como secretario particular di Minister di Comercio y Cooperacion pa Desaroyo. Minister Endy Croes ta gradici Sr. David Abrahams cu pa durante varios aña a eherce e posicion aki. Finalmente, Minister Endy Croes ta felicita Sr. Storimans cu su encargo nobo y ta dese'e hopi exito cu e etapa nobo aki.





Innovation. Green Hydrogen

ACCIONA ENERGÍA Y ARUBA TA FIRMA MOU PA DESAROYO DI UN GREEN HYDROGEN VALLEY

ACCIONA Energía a anuncia awe e firmamento di un MOU hunto cu companianan di energia di Aruba pa traha hunto ariba desaroyo di un Green Hydrogen Valley na e Isla di Aruba.

ACCIONA Energía lo traha hunto cu Gobierno di Aruba su entidadnan di energia pa desaroya, traha y opera un planta di hidrogeno berde pa un proyecto di energia renobabel sostenibel. E electricidad genera lo ser uza pa produci primeramente hidrogeno berde y locual resta lo ser uza internamente pa reduci uzo di combustibel fosil importa. E proyecto aki lo haci uzo di e tereno cu actualmente ta pertenece na Gobierno su entidad, Refineria di Aruba N.V., awa lo wordo suministra pa WEB Aruba, mientras cu Elmar lo maneha distribucion y transmision di energia den e red.

ACCIONA Energía lo brinda sosten na Gobierno di Aruba su entidadnan di energia cu e implementacion di e infraestructura necesario pa traha un ecosistema di hidrogeno renobabel riba e isla y explora uzo suplementario pa e hidrogeno berde incluyendo e oportunidadnan di exporta.

Pa medio di e proyecto transformado aki, Gobierno di Aruba y su entidadnan di energia ta prepara pa fortalece nan compromiso pa haya independencia

di energia. Pais Aruba tin como meta pa cambia for di un fuente tradicional di energia, y pone un meta ambicioso pa establece energia renobabel como fuente primario pa aña 2050.

ACCIONA Energía ta den bon posicion pa traha hunto cu Gobierno di Aruba y su entidadnan di Energia riba e proyecto innovativo aki y contribui na decarbonizacion di e isla cu su vision di un futuro di energia renobabel.

Na Maart 2022, ACCIONA Energía a inaugura su proyecto yama “Power to Green Hydrogen Mallorca”, cual ta inclui e construccion di e planta electrolysis, e desaroyo di dos planta fotovoltaico cu ta mantene e planta electrolysis, y tambe un stacion di refuel hidrogeno berde na e isla. Ademá, e compania ta progresando na e desaroyo di un planta di produccion di hidrogeno berde na escala industrial na Navarra, Spaña, cu lo cuminsa genera hidrogeno berde na 2025.

Cu e MOU aki, ACCIONA Energía y Gobierno di Aruba ta cumisa un colaboracion pa establece un ecosistema di hidrogeno renobabel pa Aruba cu no ta solamente pa transforma industrianan local, pero tambe pa extende e alcance pa e region di Caribe y mas aleu.



Desaroyo y progreso di un pais ta mas
sostinibel, fuerte y lihe ora cu cada
ciudadano di e pais uni den esfuersonan
y contribui cu positivismo na e vision
pa logra cosnan grandi pa futuro.

2023 AÑA DI UNION Y POSITIVISMO! _____